

Bil. 21

Selasa

26 Julai 2022



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KELIMA
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Projek-Projek Pembaikan Bangunan Sekolah
di Kota Setar**
- YB. Tuan Chan Ming Kai (*Alor Setar*) (Halaman 1)
- **Masalah Kenaikan Harga Hasil Ternakan
yang Mendadak**
- YB. Tuan Cha Kee Chin (*Rasah*) (Halaman 3)

MALAYSIA
KAMAR KHAS
PARLIMEN KEEMPAT BELAS
PENGGAL KELIMA
MESYUARAT KEDUA
Selasa, 26 Julai 2022

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

Projek-projek Pembaikan Bangunan Sekolah di Kota Setar

2.34 ptg.

Tuan Chan Ming Kai [Alor Setar]: Terima kasih Tuan Yang di-Pertua, Yang Berhormat Timbalan Menteri Pendidikan. Saya berhasrat untuk mengemukakan usul berkenaan projek-projek pembaikan bangunan sekolah di daerah Kota Setar.

Untuk makluman Menteri, banyak sekolah di sekitar kawasan daerah Kota Setar sudah uzur dan daif. Akan tetapi, permohonan projek pembaikan sering ditolak atau ditangguhkan sehingga kerosakan bertambah buruk. Minta Menteri menjelaskan sejauh mana kelulusan bagi permohonan projek pembaikan bumbung dan siling kantin bagi Sekolah Kebangsaan Wan Sulaiman Sidiq di mana kerosakan telah menjadi kritikal sehingga pelajar terpaksa makan di bawah khemah sementara.

Minta Menteri menjelaskan juga sejauh mana kelulusan bagi permohonan projek penyelenggaraan pendawaian elektrik bagi Sekolah Kebangsaan Kampong Gelam yang masih tertangguh di mana pelajar di kelas sering menghadapi keadaan putus bekalan elektrik. Minta Menteri menyatakan juga sejauh mana status kerja-kerja meroboh bangunan daif dan pembinaan bangunan baharu yang sudah lama dirancang di Sekolah Kebangsaan Haji Wahab, Kampung Tok Keling.

Minta Menteri senaraikan permohonan projek-projek pembaikan yang masih dalam proses bagi setiap sekolah di daerah Kota Setar dan senarai projek yang telah diluluskan serta jumlah peruntukan yang terlibat semenjak tahun 2018 sehingga kini.

Memandangkan harga bahan binaan semakin meningkat, minta Menteri jelaskan proses kelulusan memakan masa panjang ini bakal menyebabkan peruntukan yang diluluskan sudah tidak relevan di mana kos bahan telah meningkat serta kerosakan turut bertambah buruk semasa proses permohonan.

Bagaimana kementerian boleh memastikan peruntukan kos bertambah disebabkan kelewatan kelulusan tersebut sementara tidak menjejaskan kualiti kerja yang sepatutnya. Sekian, terima kasih.

2.36 ptg.

Timbalan Menteri Pendidikan II [Datuk Mohamad bin Alamin]:
Bismillahi Rahmani Rahim. Assalamualaikum warahmatullahi wabarakatuh. Terima kasih, Tuan Yang di- Pertua, terima kasih kepada sahabat saya Yang Berhormat Alor Setar.

Tuan Yang di-Pertua, Kementerian Pendidikan Malaysia (KPM) sentiasa memberi perhatian kepada usaha pembaikan infrastruktur dan fasiliti bangunan yang dapat berfungsi dalam keadaan baik untuk semua sekolah di seluruh negara.

Bagi sekolah-sekolah yang mengalami kerosakan di Kedah, KPM menyalurkan peruntukan penyelenggaraan kepada Jabatan Pendidikan Negeri (JPN) Kedah dan Jabatan Kerja Raya (JKR) Kedah untuk melaksanakan pembaikan berdasarkan tahap kerosakan menggunakan Skor Gred Impak.

Untuk makluman Ahli Yang Berhormat, bagi Sekolah Kebangsaan Wan Sulaiman Sidiq dan Sekolah Kebangsaan Kampung Gelam, Kota Setar, KPM telah menyalurkan peruntukan sebanyak RM20,000.00 untuk melaksanakan kerja-kerja penyelenggaraan kecil dan pembaikan kerosakan.

Manakala bagi pembaikan kerosakan bumbung kantin dan pendawaian elektrik di sekolah terbabit telah dirujuk kepada Jabatan Kerja Raya untuk menilai tahap kerosakan dan cadangan kerja pembaikan. Ini kerana, skop kerja berkenaan memerlukan kepakaran teknikal yang khusus bagi tujuan pelaksanaan.

Bagi Sekolah Kebangsaan Haji Wahab, Alor Setar, Kedah, KPM telah diluluskan kos projek berjumlah RM5 juta di bawah Rancangan Malaysia Ke-12 (RMKe-12), *Rolling Plan 1* (RP1). Skop projek meliputi merobohkan dan membina sebuah bangunan satu tingkat yang mengandungi satu bilik j-QAF, satu bilik skim pinjaman buku teks, satu bilik guru, satu tandas murid lelaki, satu tandas murid perempuan serta lain-lain kemudahan mengikut piawaian. Status pelaksanaan projek ini adalah di peringkat prabina.

Untuk makluman Ahli Yang Berhormat, khusus di daerah Kota Setar, Kedah, KPM telah menyalurkan peruntukan sebanyak RM17.734 juta bagi kerja-kerja penyelenggaraan dan pembaikan sekolah dari tahun 2018 sehingga tahun 2022.

Selain daripada Sekolah Kebangsaan Wan Sulaiman Sidiq, Sekolah Kebangsaan Kampung Gelam dan Sekolah Kebangsaan Haji Wahab khusus bagi daerah Kota Setar, Kedah, KPM telah melaksanakan kerja-kerja penyelenggaraan dan pembaikan di 32 buah sekolah yang melibatkan peruntukan sebanyak RM2.298 juta. Senarai sekolah yang terlibat – panjang, nanti saya bekalkan kepada Yang Berhormat.

Untuk makluman Ahli Yang Berhormat, KPM telah diluluskan sebanyak 12 projek di bawah RMKe-12, *Rolling Plan 2* tahun 2022 bagi naik taraf dan penggantian bangunan daif di sekolah dalam daerah Kota Setar dengan kos sebanyak RM120 juta. Senarai projek yang terlibat juga saya akan bekalkan

kepada Yang Berhormat, sebanyak 12 buah sekolah yang terlibat yang saya nyatakan tadi.

KPM sentiasa memberi perhatian kepada usaha menyediakan fasiliti pendidikan seperti bangunan akademik, kemudahan sekolah dan lain-lain agar dapat berfungsi dengan baik, selamat dan kondusif digunakan oleh warga sekolah. Sekian, terima kasih.

Masalah Kenaikan Harga Hasil Ternakan yang Mendadak

2.40 ptg.

Tuan Cha Kee Chin [Rasah]: Terima kasih, Tuan Yang di-Pertua. Saya ingin membangkitkan masalah kenaikan harga hasil ternakan tempatan di pasaran domestik sejak tahun lepas. Kenaikan harga ayam yang mendadak telah menjejaskan kuasa membeli rakyat kita, ia juga telah mengakibatkan kenaikan kos sara hidup orang awam. Ayam merupakan makanan jenis daging yang paling diminati orang rakyat pelbagai kaum di negara kita dan kenaikan harga ini sudah semestinya telah mendatangkan kesan buruk kepada kos sara hidup rakyat.

Walaupun kerajaan pernah memberikan subsidi dengan menetapkan harga siling ayam pada RM8.90 sekilo pada awal tahun ini dan kini, harga siling ditetapkan pada RM9.40 sekilo. Namun, harga sebegini masih membebankan rakyat jelata khasnya golongan B40. Tambahan pula, kedengaran rungutan kekurangan bekalan di beberapa tempat sejak awal tahun ini dan menjelang Raya Aidilfitri tempoh hari.

Selain itu, harga telur ayam yang kini ditetapkan pada harga siling 45 sen, 43 sen dan 41 sen sebiji untuk gred 'A', 'B' dan 'C' masing-masing juga dianggap tinggi dan membebankan rakyat. Kita sedia maklum bahawa telur ayam merupakan sumber protein yang paling utama, khasnya untuk golongan B40. Jadi, tempias kenaikan harga telur paling dirasai oleh golongan ini.

Telur ayam juga merupakan bahan makanan asas untuk pelbagai hidangan. Dengan kenaikan harga yang mendadak dan tinggi ini, sudah pastinya harga makanan lain yang berkaitan turut meningkat.

Selain itu, untuk masyarakat bukan Islam, harga daging khinzir juga melonjak tinggi sejak beberapa bulan yang lepas. Jika dibandingkan dengan harganya 6 bulan lepas, terdapat kenaikan yang melebihi harga asal sebanyak 60 peratus. Berlaku kenaikan harga hampir setiap bulan. Sudah pastinya kenaikan ini telah menjejaskan kuasa membeli golongan yang membelinya. Sila berikan maklum balas terhadap persoalan berikut:

- (a) sila senaraikan punca-punca kepada kenaikan harga ayam, telur dan khinzir tersebut;
- (b) apakah langkah kerajaan untuk mengurangkan kebergantungan kepada dedak atau makanan haiwan yang diimport dari luar negara;
- (c) berapakah lamakah langkah menetapkan harga siling ayam dan siling akan berterusan? Apakah faktor yang diambil kira oleh kerajaan dalam menentukan selama manakah penetapan harga siling ini akan berterusan;

- (d) apakah kerajaan berhasrat untuk mengambil langkah intervensi dengan memberikan subsidi kepada penternak khinzir, seperti mana untuk penternak ayam; dan
- (e) apakah ada perancangan daripada pihak Yang Berhormat Menteri Pertanian dan Industri Makanan untuk mengadakan pertemuan dengan wakil penternak khinzir seperti mana pertemuan dengan wakil penternak ayam untuk mendengar rintihan mereka, dan sama ada MAFI ada apa-apa perancangan untuk menstabilkan harga daging khinzir di pasaran?

Sekian, Terima Kasih.

2.43 ptg.

Timbalan Menteri Pertanian dan Industri Makanan II [Datuk Dr. Nik Muhammad Zawawi bin Haji Salleh]: *Bismillahi Rahmani Rahim*. Terima kasih, Tuan Yang di-Pertua, dan terima kasih Yang Berhormat Rasah. Untuk memberikan jawapan kepada soalan (a), terdapat beberapa faktor yang menjadi punca kepada kenaikan harga ayam, telur dan daging khinzir pada tahun 2022.

Antaranya adalah seperti berikut; Pertama, peningkatan kos makanan ternakan. Subsektor penternakan unggas dan khinzir bergantung kepada import jagung bijian dan *soybean meal* (SBM) sebagai bahan utama makanan ternakan. Kos makanan ternakan menyumbang antara 60 peratus hingga 70 peratus daripada kos keseluruhan pengeluaran ternakan.

Rangsum makanan ternakan menggunakan jagung bijian sebanyak 50 peratus hingga 55 peratus dan *soybean meal* (SBM) sebanyak 25 peratus hingga 30 peratus. Keperluan tahunan bagi jagung bijian, keperluan adalah sebanyak empat hingga tujuh juta tan metrik setahun dengan penggunaan sebanyak 3.6 hingga 4.0 kilogram bagi ayam pedaging untuk mencapai berat dua kilogram dalam tempoh penternakan selama 35 hingga 42 hari.

Bagi ayam penelur adalah sebanyak 42 kilogram hingga 47 kilogram setahun untuk tempoh bertelur selama 52 minggu untuk menghasilkan 300 biji telur ayam. Bagi ternakan khinzir pula, sebanyak 547 kilogram hingga 600 kilogram jagung diperlukan bagi setiap *standing pig population* (SPP) untuk menghasilkan 80 kilogram hingga 100 kilogram seekor khinzir hidup.

Harga import jagung dan SBM sejak Januari 2022 sehingga Julai 2022, masing-masing menunjukkan peningkatan sebanyak dan 12.8 peratus hingga 17.65 peratus. Sebagai contoh, pada bulan Januari 2022, harga jagung bijian ialah RM1,445 per tan metrik berbanding RM1,630 per tan metrik pada Julai 2020. Bagi SBM pula pada bulan Januari 2022, harga jagung bijian ialah RM2,295 per metrik tan berbanding RM2,700 per metrik tan pada Julai 2020. Ini telah menyebabkan kenaikan harga makanan komersil bagi ayam sebanyak 15.4 peratus dan khinzir sebanyak 13.4 peratus.

Kedua, kekurangan pekerja asing dan kenaikan kos upah pekerja. Subsektor penternakan terutamanya industri penternakan unggas dan khinzir mempunyai keperluan pekerja asing yang tinggi bagi memastikan operasi ladang dapat dioptimumkan.

Susulan arahan penutupan sempadan akibat pandemik Covid-19, ramai pekerja asing telah pulang ke negara masing-masing. Pada masa kini

dianggarkan keperluan pekerja subsektor ternakan adalah seramai 42,045 orang manakala bilangan pekerja asing yang masih bekerja di ladang adalah seramai 27,329 orang. Kekurangan seramai 14,716 orang ataupun 35 peratus pekerja asing di ladang telah menyebabkan kenaikan kos upah pekerja yang ditanggung oleh ladang.

Ini turut menyebabkan aktiviti ladang seperti pemvaksinan anak ayam, kutipan telur dan pemberian ubat-ubatan kepada ternakan ayam terjejas. Ekoran daripada itu, penyakit yang boleh dicegah seperti penyakit sampar ayam masih berlaku dan menyumbang kepada pengurangan pengeluaran ayam dan telur.

Bagi soalan (b), bagi mengurangkan kebergantungan kepada dedak atau makanan haiwan yang diimport dari luar negara, kementerian telah mengambil inisiatif-inisiatif seperti berikut;

Pertama, program penanaman jagung bijian dalam negara yang berkeluasan sehingga 80,000 hektar dengan sasaran pengeluaran jagung bijian tempatan sebanyak 1.44 juta tan metrik menjelang tahun 2033. Program ini dijangkakan dapat mengurangkan kebergantungan kepada sumber jagung import sebanyak 30 peratus.

MAFI akan turut memfokuskan model untuk diusahakan oleh syarikat swasta, GLC, koperasi dan sebagainya yang berminat melabur dalam pembangunan industri jagung bijian serta mempunyai keupayaan kewangan, *landbank* serta teknikal dalam keseluruhan rantai bekalan memandangkan jagung bijian lebih ekonomik sekiranya ditanam di kawasan berskala besar; dan

Kedua, menjalankan kajian bagi menghasilkan bahan mentah gantian dalam rumusan makanan haiwan daripada sumber tempatan seperti isirung sawit dengan bekerjasama dengan Kementerian Perusahaan, Perladangan dan Komoditi. Begitu juga dengan dedak beras, mil ikan dan mil ofal ikan, *larva black soldier fly* dan sisa hampas soya.

Bagi soalan (c), kerajaan melalui Kementerian Perdagangan Dalam Negeri dan Hal Ehwal Pengguna (KPDNHEP) telah mewartakan harga siling ayam dan telur bermula pada 5 Februari sehingga 31 Ogos 2022 menerusi Skim Harga Maksimum Keluarga Malaysia (SHMKM).

Susulan kawalan harga siling tersebut, penternak tidak dapat menjual ayam dan telur pada harga apungan. Oleh itu, kerajaan bersetuju untuk memberi subsidi kepada penternak ayam dan telur sepanjang SHMKM dilaksanakan melibatkan peruntukan sebanyak RM1.1 bilion. Tempoh penetapan harga siling adalah di bawah bidang kuasa KPDNHEP dan pihak MAFI mengadakan sesi libat urus dengan penternak dalam perbincangan berkaitan penetapan kawalan harga siling di peringkat ladang.

Bagi soalan (d), kerajaan bersedia untuk mengkaji keperluan langkah intervensi seperti pemberian subsidi bagi setiap subsektor ternakan sekiranya perlu. Pada masa kini, harga daging khinzir di peringkat runcit adalah tidak dikawal kecuali pada musim perayaan seperti Tahun Baharu Cina. Harga apungan ditentukan melalui penawaran dan permintaan pasaran.

Bagi soalan (e), Yang Berhormat Menteri Pertanian dan Industri Makanan sentiasa memberi peluang mengadakan pertemuan dan libat urus dengan golongan sasar untuk membincangkan perkara semasa berkaitan industri termasuk penternak khinzir.

Kementerian juga telah merangka beberapa cadangan untuk menstabilkan bekalan khinzir melalui tindakan-tindakan seperti berikut:

- (i) penambahan kelulusan loji import pemprosesan daripada 105 buah loji kepada 115 buah loji dengan penambahan empat buah negara import baharu; dan
- (ii) menjalankan audit kelulusan loji import melalui kaedah *system-based* serta pengukuhan pelaksanaan *Modern Pig Farming* (MPF) bagi meningkatkan *efficiency* pengeluaran ladang khinzir sedia ada.

Sekian, terima kasih.

Timbalan Yang di-Pertua [Dato' Mohd Rashid Hasnon]: Ahli-ahli Yang Berhormat, Mesyuarat Kamar Khas hari ini ditangguhkan sehingga hari Rabu, 27 Julai 2022, jam 2.30 petang. Terima kasih, Ahli-ahli Yang Berhormat.

[Kamar Khas ditangguhkan pada pukul 2.53 petang]